



06/02/2015

Novitads dalla suprastanza communal

Lescha d'energia

La suprastanza communal ha relaschau las disposiziuns executivas tier la lescha d'energia dils 28-09-2014. Ils formulars per damondas da contribuziuns per la promoziun d'efficienza energetica ed energias regenerablas sco era per apparaturas el tenercasa ein d'anflar sut www.lumnezia.ch → Survetschs online → Formulars.

Sboz dallas leschas davart il provediment d'aua e la dismessa dall'aua piarsa

Ils 16 da schaner 2015 ha ina sera d'informaziun per presentar ils sboz dalla lescha davart il provediment d'aua e dalla lescha davart la dismessa dall'aua piarsa giu liug. La lescha vegn suttamesa ils 6 da mars 2015 alla radunonza communal e decidida el decuors digl onn all'urna.

Lescha da sepultura e santeri

La suprastanza ha elegiu ina cumissiun per elavurar ina lescha da sepultura e santeri per nossa vischnaunca. Quella secumpona dils suprastants comunals Daniel Solèr e Clemens Arpagaus e dalla collavuratura dall'administraziun communal, Martina Caviezel.

Iniziativa per abolir tempo 30

L'iniziativa per abolir tempo 30 els vitgs da Cumbel e Degen vegn suttamesa ils 8 da mars 2015 alla votaziun all'urna. La radunonza communal ha refusau l'iniziativa cun 76 encunter 29 vuschs.

Project da baghegiar entuorn e sanar il „Mulin Morissen“ per in menaschi d'ustria

La suprastanza communal ha surdau a Special Design GmbH Trun, d'elavurar in project cun ina calculaziun da cuosts per baghegiar entuorn e sanar il "Mulin Morissen" per in menaschi d'ustria. Il project vegn presentaus alla radunonza communal per prender conclus. La vischnaunca da padrinadi dad Unterengstringen susteness il project.

Anteriura casa communal a Chigliver/Vella

A caschun dalla radunonza communal dils 19 da december ei il project da baghegiar ora ina habitaziun ellas alzadas sura dalla casa Chigliver 83 a Vella vegnida approbada. La suprastanza communal ha surdau las lavurs d'architectura al biro d'architectura e d'inschignier, Arthur Caduff da Degen.

Prezis da lenna

Per saver cuvierer ils cuosts da lavur, ha la suprastanza communal decidiu d'augmentar ils prezis da lenna. Ils prezis per lenna da brisch ein vegni alzai per mintgamai CHF 15.00/m³.

Digitalisaziun dalla planisaziun locala per ils vischinadis da Degen e Vrin

La suprastanza communal ha decidiu da far la digitalisaziun dalla planisaziun locala per ils vischinadis da Degen e Vrin.

Sanaziun dalla via cantunala tras ils vitgs dalla vischnaunca Lumnezia

Il cantun preveda da sanar la via cantunala tras il vitg da Vella el decuors digl onn 2016. Ulteriuras sanaziuns ein previdas a Lumbrein e Vrin.